

Bila wanita pula beradu 'kekuatan'

1 - MAY 1983

MEMANG tidak mudah untuk berjaya dalam satu-satu pertandingan, apa lagi untuk merebut kejohanan acara silat seperti yang ternyata dalam gambar kiri ini.

Dua orang peserta pusingan akhir Kelas 'C' Wanita acara silat antara balai-balai rakyat anjuran Persatuan Rakyat, Cik Maznah Mazlan (kiri) dan Cik Latipah A. Bakar (kanan), sedang beradu kemahiran di 'medan perjuangan' Kompleks Sukan Delta, petang semalam.

Cik Latipah dari balai rakyat Cairnhill telah berjaya dalam pertandingan tersebut. Lebih dari 10 orang peserta bertanding dalam acara itu semalam.

Malam ini, sebahagian lagi peserta akan turut bertanding. Balai rakyat terbaik akan menerima piala pusingan Setiausaha Parlimen (Perdagangan dan Perusahaan merangkap Hal-Ehwal Masyarakat) Haji Sidek Saniff.

Haji Sidek Saniff menyampaikan hadiah-hadiah kepada para pemenang di akhir pertandingan ini.

Sementara itu, pengerusi pertandingan, Encik Tan Klan Hin, berkata beliau puas hati dengan pertandingan petang itu. Setiausaha bersama pertandingan, Encik Johari Uriff pula berkata kira-kira 60 peratus dari tiket-tiket berharga \$2.00 habis dijual.

Berdiri di tengah-tengah dalam gambar, dengan pakaian serba putih adalah salah seorang dari pengadil pertandingan, Cik Misratin Tukiman.